

# Percubaan terakhir Najib mohon penangguhan hari ini



Bekas Perdana Menteri, Datuk Seri Najib Tun Razak tiba di Mahkamah Persekutuan bagi menghadiri prosiding kes rayuan akhirnya berkaitan sabitan dan hukuman penjara penyewelengan dana SRC International Sdn Bhd (SRC) di Istana Kehakiman, Putrajaya. Foto HAZROL ZAINAL, 16 OGOS 2022.

PUTRAJAYA – Prosiding rayuan akhir kes penyelewengan dana RM42 juta milik SRC International Sdn Bhd (SRC) yang sedang dihadapi oleh Datuk Seri Najib Razak akan bermula sebentar lagi di hadapan lima panel Hakim Mahkamah Persekutuan.

Dijangka barisan peguam bekas perdana menteri itu akan membuat percubaan terakhir hari ini untuk memohon penangguhan prosiding rayuan itu kepada panel hakim diketuai oleh Ketua Hakim, Tun Maimun Tuan Mat.

Jika gagal bermakna prosiding akan berterusan sehingga 26 Ogos depan seperti yang telah ditetapkan sebelum ini.

Tidak dapat dipastikan sekiranya penangguhan ini gagal sama ada barisan peguam baharu yang diketuai oleh Hisyam Teh Poh Teik akan menarik diri dari terus mengendalikan kes Najib.

Walaupun sudah ditanya beberapa kali oleh media, Hisyam tetap tidak memberi pengesahan berikutan keputusan itu sejak beberapa lalu.

Semalam ketika bercakap dengan MalaysiaGazette, peguam, Datuk Geethan Ram Vincent memberitahu, Najib yang juga Ahli Parlimen Pekan hanya mempunyai pilihan cukup terhad dalam percubaannya untuk mengetepikan sabitan dan hukuman penjara 12 tahun serta denda RM210 juta yang diputuskan Mahkamah Tinggi pada 28 Julai 2020 dan dikekalkan Mahkamah Rayuan pada 8 Disember tahun lalu.